

涵芬樓古今文鈔

呂景端
書藏

酒樓古今文鈔

卷之四

涵芬樓古今文鈔卷九十六目錄

辭賦類

賦上五

大禮慶成賦 張耒

齋居賦 張耒

鳴鷄賦 張耒 三十四句

雨望賦 張耒 二十八句

鳴蛙賦 張耒

哀伯牙賦 張耒 四十八句

求志賦 晁補之

北渚亭賦 晁補之

黃樓賦 秦觀

送將歸賦 蔡確

五十一句

天下爲一家賦 呂大鈞

南征賦 邢居實

宣防宮賦 劉跂

南都賦 王仲夷

颶風賦 蘇過

思子臺賦 蘇過

參賦 米黻

采石賦 程俱

廣汴都賦 李長民

朝山堂賦 晁公遡

四十六句

辨烏賦 虞允文

孔牀賦 梁安世

會稽風俗賦 王十朋

民事堂賦 王十朋

蓬萊閣賦 王十朋

良千竭賦 吳儆

雁蕩山賦 薛季宣

石菖蒲賦 王炎

淮海樓賦 陳造

游紫霞巖賦 樂雷發

南湖賦 陳彥博

興學賦 申良佐

巖蔓聚奇賦 王寂

海青賦 趙秉文

栖霞賦 趙秉文

四十八句

游西園賦 趙秉文

二十三句

秋望賦 元好問

行齋賦 元好問

三十一句

瑟賦 熊朋來

烏木杖賦 姚燧

求志賦 袁裒

畫枯木賦 虞集

二十三句

傷已賦 馬祖常

感志賦 李好文

奉制撰蟠桃核賦 宋濂

北京賦 李時勉

大韶賦 貝瓊

友筠軒賦 方孝孺

試三農望雪賦 徐有貞

水仙花賦 徐有貞

思歸軒賦 王守仁

弔屈平賦 王守仁

頑山賦 黃淳耀

涵芬樓古今文鈔卷九十六

侯官吳曾祺纂錄

辭賦類

賦上五

大禮慶成賦

張耒

惟宋六世皇帝踐阼之七年。所以和同天人。綏靜中外。垂鴻襲裕。增高累厚。以對神祇祖考者。固已蒙被充塞。光融翕赫。六合一意。四海一口。無得而言矣。粵以壬申之仲冬。將有事於南郊。乃詔列位。恪職賦事。而有司建言。惟我國家。因時施禮。郊邱之位。天地咸在。牲幣並薦。禮樂合舉。而古者乃以陰陽之至。卽南北之郊。別位殊時。薦獻異數。有司其何從。於是天子惕然深思。祇畏敬戒。曰。茲大事。我其敢專。羣公卿士典禮之官。竭思和會。以訂不易。於是議者曰。先王齊明以享帝。而帝之享否。雖聖人末由知之。惟受福者。其享之占也。恭惟國家合際天地。于茲六世。

矣。惟我太祖躬膺駿命。以遏亂略。堂皇二儀。拓落八極。以定萬世之業。太宗威定宇內。震蕩大鹵。以一九有。定天下於一尊。眞宗熙洽富盛。符瑞委積。南牧之獫。不戰請命。威加北荒。奏功岱宗。仁宗席安據厚。不動指顧。孽獠猾羌。含毒內向。吏士未頓。藏竄屈伏。終始太平。垂五十年。英宗入纂。百姓與能。神考有爲。六服承德。此可謂受天地之福矣。然則神祇之安吾享也其久哉。於是天子乃翳青雲之屋。乘雕玉之輿。應龍受轡。招搖翼輶。建虹霓之修竿兮。颺彗星之飛旂。太一執節以先驅兮。二十八星拱手布武。經營而周流。貔貅六師。雷霆萬乘。初海沸而雲湧。忽山峙而川靜。蓋天子粹然玉溫。健然天運。望宮門而動色。顧執策而命進。惟烜赫之靈源兮。實鼻祖於神明。覽光德而來降兮。館玉宇之嚴清。張咸英之廣樂。備千籥之盛舞。景光交徹。鸞鶴下神。嬉靈豫醉。爵俎翼翼。清廟觀德之官。七聖在天。時降于宗。世有哲孫。豈弟無疆。惠我文人。瞻祖祏而念功兮。顧禰室而感親。聖考油然發中兮。在位望而含辛。霽暘告旦。祥飈掠塵。從我髦士。來祇精禋。御史肅吏。司馬

飭兵。旣透透遲遲雲流而日行兮。又洶洶業業海運而天聲。靈旗洪旆翕赫歟霍兮。攫拏龍虎而亂鯤鵬。雄鷺懜威而震伏兮。柔良化禮而肅清。弛威弧戢天戈兮。固已熄滅蚩尤而折橈槍。執飛廉罔商羊屬之有司兮。羲和磨刮披拂盡獻其光明。蓋傾都空閭。翹首跂足。俯窺履綦。傍覘佩玉者。忽焉不知手之加頰。口之成祝也。於是背都城。望帷宮。郊垆垣其迤邐兮。場圃旣寒而畢功。頽青雲以連屬。粲虹霓之經緯。紫微下屬於兩觀。勾陳錯施於萬雉。扶傾之神。仰立而拱。翔德之龍。下抱而曳。疑神變之歛成兮。涌九地而出峙。連廡千柱。廣殿萬杙。飛藁鬬桷。洞牖屹壁。酸股之隅。眩目之極。唐洛執算而莫計。班倕操斤而自惑者。類非資材於斲塏。而皆機杼之紡績也。一室之用。足以溫一家。一宮之費。何啻衣一國。驚霆之蹕旣震。洶壑之聲咸寂。寢之靜深兮。何清虛而邃密。天子方端而虛。儼而一。多儀未舉。精意已塞。甲夜始晦。嚴鼓載作。飛斂走伏。神讐鬼愕。望騰精以燭宵兮。玄冥收威而布德。震鼉五震。軫車將中。天子乃被袞執玉兮。齊明莊栗之誠。動于進趨。表于

形容千燎具揚。萬炬畢融。上揜煢惑。旁爍燭龍。近爲朝暘。遠爲融風。赫赫曦曦。煌煌輝輝。列次之士。野屯之師。歸如酌醕。醪而御兼衣。黃流汪洋。璧玉照徹。祥祲衡布。協氣下浹。音爲樂和。形爲人悅。白質之獸。簫聲之鳥。紛披雜沓。應奏而舞節。陟降旣周。燎煙始升。奔星走虹。奉璧薦牲。豐隆奔馳而仰驚兮。祝融焜煌而上征。開闔闔兮闢清都。后帝燕兮百神愉。圓錫蓋兮方獻輿。岳輸固兮溟効濡。於是禮備樂成。整車而旋。萬類環極。端門闢天。賞出千庾。恩流百川。北包大壤。南盡島蠻。西越流沙。東窮海壖。令未脫口。雷運風傳。野無窮人。獄無宿愆。破械解縲。負帛囊錢。車及其舍。士復其伍。効技呈才。千饒萬鼓。天子舉酒以屬羣公。咸曰。休哉。天子之功。系曰。於穆聖主。建皇極兮。嚴恭精禋。帝來格兮。柔祇並位。儼牲璧兮。文祖右坐。臨有赫兮。於惟祖宗。有常則兮。諱兵畏刑。後貨食兮。政有損益。茲不易兮。帝則鑒之。戢穀錫兮。兢兢業業。日一日兮。三載一祀。年萬億兮。

仲夏之月。陰氣始至。陽既盛而初剝。陰浸亨而用事。水伏畏涸。火燎方熾。其於人也。心實過炎。而腎受其弊。惟人之生。受命在子。推卦曰坎。於行爲水。微陽所潛。元氣之始。故火甚烈。則正氣或因而衰。則水受害者。君子之所深畏。於是居事燕息。滌慮齋居。既靜事以爲形。又遠眺而高居。卻紛華而弗陳。與淡泊乎爲徒。絕嗜窒慾。愛精膏神。聲色不御。滋味罕親。沖然與和俱游。湛兮以道合真。故能體強志甯。愉樂壽考。遠去疾厲。保此難老。嗚呼。苟能推此以盡道。考此以察物。則豈惟齋戒以御時。宜其顛沛而弗失。且夫冰炭相乘。利害交至。隕眞盜和。豈獨陰沴。道心惟微。易失難常。困於侵陵。有如微陽。則浣心滌志。以卻外垢。虛中保和。以全天君。故能涉至變而不濡。更萬變而常存。蓋將窮年以齋居。豈特養生而善身乎。

鳴雞賦

張耒

先生閒居學道。昧旦而興。家畜一雞。司晨而鳴。畜之既老。語默有程。意氣武毅。被服鮮明。綈綈朱冠。丹頸玄膺。蒼距矯攫。秀尾翹騰。奉職有恪。徐步我庭。啄粟飲水。

孔肅靡爭。山川蒼蒼。風霰宵凝。黯幽窗之沉沉。恍余夢之初驚。萬里一寂。鐘鼓無聲。聞振衣之膈膊。忽孤奏而泠泠。委更籌之雜亂。和城角之淒清。應雲外之鳴鴻。弔山巔之落星。歌三終而復寂。夜五分而既更。萬境皆作。車運馬行。先生杖屨而出。觀大明之東生。

雨望賦

張耒

淡海天之蒼茫。觀驟雨之霽霽。飄風擊而雲奔。曠萬里而一蔽。卒然如百萬之卒。赴敵驟戰兮。車旗崩騰。而矢石亂至也。已而餘飄既定。盛怒已泄。雲逐逐而散歸。縱橫委乎天末。又如戰勝之兵。整旗就隊。徐驅而回歸兮。杳然惟見夫川平而野闊。夫雲霞風月之容。雷雨電雹之變。非巧力之能爲。蓋人間之絕觀。必也登雄樓傑閣之崢嶸。憑高山巨海之空曠。被除耳目之障礙。而後能窮極變化之奇狀。嗟我居之卑湫兮。束視聽於尋丈。顧所欲之莫得兮。徒臨風而惆悵。

鳴蛙賦

張耒

余寓山陽學舍。夏大雨。屋四隅成塘。聚蛙以千計。聲鳴不絕。夜爲不能寢寐。客有獻予以殺蛙之術。曰。投余藥一丸。蛙無類矣。童子將用之。予曰。不可。復爲賦示之。夏雨初止。積潦過尺。有蛙百千。更跳互出。幸此新霽。夜月清溢。我勞其休。歸偃於室。于時蛙鳴。若嘯若啼。若訴若歌。若歡若悲。若喜而語。若怒而詬。若噉而嘔。若咽而噉。瘖者之呼。吃者之鬪。或急或緩。或清或濁。若羌絲野鼓。雜亂無節兮。又似夫蠻歌獠語。鬼怪之迭作也。爾其困於泥潦。失其所處而悲。又若夫旱暵既久。得其所處而樂也。爰有童子持燭來謁曰。蛙羣夜鳴。君寢其聒。考之周官。洒灰驅蛤。君其教之。余得盡殺。余語童子。爾無是酷。爾樂而歌。而哀則哭。哭則悲嗟。樂有聲曲。聚語羣爭。引吭而呼。一日之間。不甯須臾。蛙不汝嫌。汝奚蛙誅。萬物一府。誰好誰惡。爾奚自私。己厚蛙薄。參通彼己。樂我自然。弭爾怒心。置燭而眠。夜半。張子援枕而吁。顧謂童子。記吾言歟。前言未究。請卒吾說。物各有時。夫誰敢遏。爾觀夫春露初靄。朝華始奠。文羽清喙。飛鳴自如。若奏琴箏。而和笙竽。清耳悅心。聽者爲娛。及

夫陽春旣徂。炎火將極。惡草蕃遮。淫潦瀦積。蛙於此時。生養蕃息。跳梁號呼。噫氣橫逸。子如之何。時不可逆。時乎時乎。美惡皆然。當其盛時。誰得而遷。及其雪霜旣降。木實草衰。飛蠅聚蚊。孽無所施。於是此蛙斂吻收足。阒然土中。一聲不出。黨散巢披。不可終日。盛不可常。與衰迭來。子姑忍之。奚以殺爲哉。

哀伯牙賦 張耒

伯牙鼓琴。後世無我。哀伯牙。似智而愚。天地之間。四方萬里。知爾琴者。一人而已。鍾子旣死。其一又亡。欲彈無聽。泣涕浪浪。已奏已聞。欲語不可。悞塞滿懷。無所傾寫。折楊黃華。巷歌里曲。入邑娛邑。入國悅國。回視伯牙。面有矜色。夫伎者必不和衆人之耳。而媚衆耳者。又善工之深恥。違衆者常子子。其無翼而冒恥者。乃身安而獲利。則亦安知夫至藝之非禍。而庸工之非祉也。嗟夫。將爲至巧者。必無顧於終身之無與。則至巧之於人。乃不祥之上器。操不祥之器。終身而不知。則伯牙者。乃後世之深戒。

求志賦

晁補之

幼余不自知慙兮。願求古人而與之遊。高平邑於大野兮。魯東鄙而北鄒。固余心其惻款兮。求前聖又不遠。豈無鄰莫可與謀兮。治邴氏而俗泮。幽離房誠不忍兮。弃此而莫能藏。執徐之青陽兮。余先子兮東征。橫武林之大江兮。睢始甯之南邑。路會稽以周流兮。求厯山之所在。昔封嵎之世守兮。以後夫而致刑。越懲恥於夫椒兮。進樵女而抑心。懿二臣以國霸兮。卒焉異夫出處。行束薪而自言兮。妻不忍而求去。助申威於司馬兮。卒殞聲以淮南。睚訴死於婆娑兮。悲綽約之亦纖。彼章程之詭嘯兮。旣睥睨於甲夜。何仲御之清激兮。而亦云駭夫觀者。紛回穴其莫識兮。泮千載而迹陳。思苗山猶若□兮。又何悲乎曲水。惟鄭公之志約兮。逢神人焉靡求。山岬岬而谷紆兮。風瀏瀏乎旦莫。耿吾何不可留此土兮。切悲越人之襪。豈其食鮭而化音兮。無所用吾之綏。冬朦朦其多雨兮。夏瘴熱以生蠹。溪水之淺深兮。舟上下而擊石。吾遵夏蓋之山兮。聊以觀乎遠海。吾先子之初服兮。羌董道而

不改。小人之有心兮。猶不假器末。余從於東安兮。以哲人而聞誼。蜀蘇子之有塵兮。漢遺化而多儒。往者其不可及兮。曷不從子之廬。朝余食兮山中。夕余宿乎江上。悲世俗之近市兮。余安能忍而與之皆往。余令樓季爲右兮。使王良前余。世解轡而馳石兮。緬余得此坦塗。良吾翰使環瀾兮。密吾牙使僕屬。攬九州而顧懷兮。夫安知余力之不足。遘余生之罹憫兮。歸將母乎故都。伏里門而畏鄰兮。幽獨守此四隅。時命大繆兮。吾遑遑欲何之。慨永夏之宜養。霜薶然其萃之。增歔歔以啜泣兮。殺身其安可。宇摧勞而藩穴兮。雀鼠去而不舍。僭四序之不淹兮。春藹藹其既非。攬卉木猶若茲兮。吾獨不聊此時。悲予仲之婉孌兮。饒其心以詩禮。吾不能操贏而坐閭兮。耘東山而自食。歲旱嘆而不雨兮。螟又生余之場。屬歲秋之有穀兮。河出墳而湯湯。於陵子之終編兮。井上李其猶飽。服芬芬而潔腹兮。夫豈不足以忘老。衆麀豸而好朝兮。咸得時而的皪。持衣裳而鬻暑兮。余固知余賈之不售。思遐舉而莫從兮。心紆軫而畫傷。訊黃石以吉凶兮。基十二而星羅。曰由小基大